

興城縣志卷之十四

慈善

賑糧

粥廠

義倉

義塾

捐產

施藥

義橋

婦孺救濟會

興城縣志

卷十四 慈善目錄

一

興城華昌印刷局印

興城縣志卷之十四

慈善

與胞一視痾瘵若躬疴矣完聚哀此獨惻癘病殘疾一夫不獲揆諸博濟終虧盛德旱蝗水溢天災流行履道有福任卹可風欽彼西哲蜚聲博愛當仁不讓斯爲吉藹述慈善

世以富貴之族難期累葉衣冠之子莫繼家聲輒歸咎於北方地土礪薄所致而抑知不然夫活千人者子孫有封按獄多所全活後世必有三公固無古今無南北也蓋積而必散者天之道損有餘而補不足者人事之常誠能體爲善最樂之旨存同仁一視之心將見行道有福子姓善變明德之後必有達人夫固有如操左券者美國大慈善家賈尼

基君創鋼鐵廠於本國其營業發達推爲巨擘然賈君不專求一己之富厚而以博施濟衆爲唯一事業跡其建萬國弭兵會於海牙以期世界永久之和平於各國藏書樓孤寡院多所捐助近又於吾國增設完備之醫校以求醫學蒸進施惠華人固不讓堯夫麥舟子敬困米西伯施澤枯骨仁宗救疫碎犀獨輝煌東亞史乘世有抱兼愛主義者乎不禁爲閭左編氓馨香祝之矣

賑糧

鄧氏賑糧 邑紳鄧瀛波字心齋清附貢生世居城西北茸角溝村於光緒二十一年歲大饑請於賀前州刺照黑松林押兒山二界災民戶口冊按口施放賑糧經手人爲本邑商人信興號張洛凌和興裕王洛振紅糧小米放罄繼之以芝麻綠豆共施糧約合現銀三千餘兩賀前州刺擬代爲請旌瀛波婉言謝絕至光緒二十五年歲中饑瀛波又施賑糧於黑松林一界由紅崖子商號福順永出糧數目約在一二百石土人德之至宣統元年瀛波先生卒四子韡棠字萼樓繼續先志於民國七年山地亢旱由五月初旬起至六月末旬止施放賑糧於黑松林下城廠押兒山三界出糧商號爲本邑德興增綏

中縣福慶成躍魚汀柴家茸角溝本宅共施紅糧五百五十石民國八年因在直隸朝陽縣界施放賑糧該縣公署呈請省署轉詳徐大總統世昌褒以樂善好施字樣匾額並准在籍建坊是年直隸大饑難民麇至男女孩提不絕於路韡棠在興綏交界處六股河沿及報官嶺地方施捨賑洋每人票洋一元由七月二十五日起計三個月共施票洋二萬八千餘元統計自宣統元年起至民國十二年底止施糧施洋施衣施藥立義學辦義倉共需洋拾萬餘元（義學義倉列後餘見本志孝義）

按孔子曰富而能及人者欲貧而不可得也張子西銘云富貴福澤將厚吾之生使之爲善也輕可見人特患有救濟之心無周急

之力力苟充矣即不當坐視不救全無惻隱之心况貧富之相差過甚而博施之義舉無聞不平則鳴反響立至赤化隱患即潛伏於無形之中則何如早爲之計之爲愈也

趙氏賑糧 邑紳趙鈞培字鎔九清光緒癸亥歲貢生世居城西南六十里方安堡於光緒三十一年自出小米六十石按年夏放冬收以周貧困以備凶年至民國二年因年景歉收各食戶不能如約償還由此亦遂停止約值現小洋六七百元

粥廠

劉氏粥廠 邑紳劉汝敬字慎齋清恩貢生同治元年孝廉方正世居城西北黑莊科村家素豐好施與於光緒初年設立粥廠乞食者接

踵歲以爲常光緒九年選授直隸南皮縣學官之任時噓家人曰博施濟衆是讀書人應盡事須體我心好爲之每寄家書猶殷殷以鄰里疾苦爲問卒於官（餘見本志鄉賢）

李氏粥廠 邑紳李暄字明作清歲貢生世居城西南新民屯豐於財樂善好施於道光間常年設粥廠凡附近鄰村之乏食者咸往領粥至道光十四年歲大饑除常年粥廠外另設粥廠四方就食者日數百計活人無算至今鄉人德之（餘見本志孝義）

義倉

鄧氏義倉 設於城西北茸角溝屯由鄧瀛波創辦於光緒二十六年開辦至宣統元年瀛波卒其子韡棠接續辦理其規章春放秋收每

斗加糧利二升遇歲大饑即作爲義賑秋後自備價收齊次年仍照每斗糧利二升施放如此者至數次糧石年有增減因係一家之糧故也

義塾

鄧氏義塾 設於四區馬車哈屯廟內由民國十三年成立學級四男女學生一百二十人教員四人常年經費由鄧韡棠捐助奉小洋二千元不足由學費項下補助

捐產

張氏捐產 邑人張廣建世居城裏清光緒末年將南街路東平房十餘間約值四五千元捨於宣講堂嗣民國初年經州刺曾有嚴將該

堂查封其房遂爲官有現電話局及圖書閱報社均設於此

施藥

李氏施藥 邑紳李賡唐字月秋清歲貢生世居城南關常年施捨自製紅傷藥頗有神效人多求之年約值洋四五十元現其子慶麟蔭麟克繼父志遵行不怠云（餘見本志隱逸）

楊氏施醫施藥 邑人楊新亭世居城裡善醫紅傷及各種瘡症尤善接骨自製藥料所有藥資醫費概不取償歷有年所年約需洋四五十元

馬氏施醫施藥 邑人馬朝選世居城東關先是自患頂疽賴婦翁張洛俊施治痊愈從此矢志學醫濟人盡得婦翁張氏之傳凡有鄉人

患瘡症者無論家道貧富一經延治朝選必躬親施醫施藥其孜孜不倦蓋十餘年如一日焉計所施藥資年約需洋三百元

義橋

義橋 一在城西馬圈子木板建設義主劉先周一在城西大寨木板建設義主田潤久一在城西牛彥章秫稽木標建設義主張洛西

興城縣婦孺救濟會 係教會長老劉漢樞所創設以救濟戰時婦孺使免危險爲目的由民國十四年舊歷十月十六日郭軍入城起至二十五日郭軍過境止前後收容避難男婦（幼童不計）少在二三十人多至一百餘人教會房間不敷至假用鄰近玉生恒商號祖師廟房間應用每人每日攤伙食洋五角（連做教會旗幟僱工米薪菜蔬油鹽爐煤在內）彼時街上軍隊拉夫至併米薪菜蔬不易購置本會服務人役袖箍致被軍人褫去

沙後所婦孺救濟分會凡兩處 一在南關張宅爲教民張紹周所組織一在城裡教會暨王宅爲王慶恒所組織由民國十四年舊歷十月十五日起至二十五日止計該兩處前後收容避難男婦少在百餘人多至四百餘人其避難男婦幼穉伙食所需柴米油醬菜蔬等項皆由張紹周王慶恒兩人擔任不取分文當日困難情形較興城尤甚值闔境主臣自顧不暇之秋該兩君獨能輕財好義庇護鄉鄰仁智兩全救人適以自救殆所謂識時務之俊傑歟